

# Mud Volapüka

Nüm 29

21 tobul 2016

---

## Rubrig gramatik

### Ta

Präpod „ta“ jonon das yeg anik:

1) flunon, bevobon bosi;

nafädön **ta** klif = nafädön **sui** klif = flapön klifi

stutön **ta** völ = stutön **sui** völ = dranön völi

ped mö pauns lul **ta** kvadazimmet bal = pauns lul pedons

kvadazimmeti alik

2) *taon*, *tadunon* bosi kopiko u metaforiko (flunon bosi ad votükön, neletön oni)

medin **ta** fif = medin **ad neletön** fifi

komipön **ta** neflen = bekomipön nefleni

dunön **ta** бүд = dunön **to** бүд = **no** lobedön бүди

### Te

Ladvärb „te“ sinifon „atos e nos votik, voto, plä atos“:

labob **te** dolaris lul = labob dolaris lul **e no labob dolaris voto**

sevob te nem omik = no sevob jenöfotis votik tefü om plä nem

omik

## Ti

Präpod „ti“ sinifon „mu nilü“, „löliko plä bosil“, „löliko te nen bosil“:

binos **ti** düp degid = pos timül ubinon düps deg = **te timül defon ad** düp degid

**ti** mens mil = mens läs mil komons ab utans nemödik te fablinons ad mens mil

## To, too, toä

Präpod „to“, ladvärb „too“ e konyun „toä“ sinifons „no demölo etosi das ...“, „livätiko de etos das ...“, „ta etos das ...“ e jonon das yeg anik no flunon jäfidi bosa:

ekömob **to** rein = ekömob **no demölo das** ereinos = ereinos **ab ga** ekömob

etovom lodoti at **toä** no äbinom nämik = no äbinom nämik **ab ga** etovom lodoti at

**too** älaisukom tuvedi säkäda = **ab** älaisukom tuvedi = **ye** älaisukom tuvedi = **ga** älaisukom tuvedi = no ästöpikom sukön tuvedi **to valikos** = äfövom sukön tuvedi **to valikos**

## Tu

Ladvärb „tu“ sinifon „nestöniko“, „plumafiko“:

binom **tu** liegik, *adas* vedön tifan = binom **so nestöniko** liegik *sodas no kanom* vedön tifan = binom **mu** liegik e *klu no kanom* vedön

tifan = binom **levemo** liegik, adas vedön tifan

binom **tu** bäldik adas matikön = binom **sovemo** bäldik ad matikön

## Tä

Präpod „tä“ jonon propori bosa (mödadilo suämi balata bosa pö selam, tökam):

propor mödota kvipanas e tävanas pö naf äbinon 1 **tä** 20 =  
tävans äpluons kvipanis ma mödot pö naf teldeгнаiko = pö naf kvipan  
bal äkomon **a** tävans 20 alik


buk peselon **tä** dinars kiltums = buk äsuämon dinaris kiltums =  
elofoy **tä** buk dinaris kiltums e bukiselan esion suämi at

penedamäks paselons **tä** flonazims Nedänik 50 a samäds 100 =  
penedamäks 100 suämöns flonazimis 50 = penedamäks paselons **a**  
laf flonazima

itökom cali feimacödala **tä** ut lapelacödala = ivedom lapelacödal  
**tökü** feimacödal

uduinob atosi **tä** stip bal = uduinob atosi **tökü(plas)** stip bal =  
uduinob atosi **stipä uduinol** stipi bal obik

# Sevols-li, das ... Kabovärduäns





1) Repüblikän Kabovärduänas binon län, kel papladon su ragipelag „Nisuls kepa grünik“ ninädöl nisulis gretik 10 e smalik 15 ä pö fagot mö milmets 570 de jol Vesüda-Frikop. Te nisuls 9 binons pebelödöl ai. Ragipelag idavedon sekü lerup volkanas. Do pluamanum volkanas ikvänikons bü lunüp, te tö nisul ‚Fogo‘ vulkan leiganemilabik jäfidöl papladon labü geiloti mö mets 2829. Dub jäf liföfik ona (samo, lerup lätik ijenon ün yel 1995) sürfat nisula binon blägik ti löliko.

2) Yuropans balid (melans Portugänik) inexänons su nisul ‚Sal‘ ün yel 1446. Ün yel 1462 kolunans balid isüikons su nisul ‚Santiago‘. Portugän isteton ragipelagi kolunu okik ün yel 1495. Kabovärduäns ivedons kolun Spanyäna ün yel 1581. Ün yel 1640 Portugän idönufövon reigi okik pö nisuls. Slaf äläidabinon pö nisuls jü yel 1878. Ün yel 1956 muf pro libiostadükam iprimikon, kel ifijenon ün yel 1975 kü nisuls idagetons libi. Kreol Portugänik el „cabuverdiánu“ (sa Portugänapük) pivälon as pük calöfik. Bal lonöfas püka at — geb noamis teliks ed igo kiliks.

3) Getot ledinik läna binon tör. Men alik degid tö Kabovärduäns binon törän.

4) Kabovärduäns binons motedalän kanitana gretik jiel ,Cesária Évora'. Ünü yels plu 20 (jüi dead okik ün yel 2011) äspönof donajulis valik, pluamanumi löpajulas ä lafi sanava läna. Äpubof su städ ai ön futs nüdik, das äbinon stimamal klurik pöfa kelomänanas ofik. Kodü atos panemof as „jistelan nüdafutik“ („La Diva Aux Pieds Nus“ Fransänapüko u „A Diva dos Pés Descalços“ Portugänapüko).



Säkis, küpetis e lofotis aliks ä materis e volanuns nitediks kanols lüsedön lü penedabog «komunan@yandex.ru».